



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tiryimiyim@aolima



tir yimiyim

TAPAK 7

SL den tanungba Test asaya atema Wood melen Hull shimogo

Josh Hull

France nung Telegram CEO Pavel Durov puogo

VOL. XXI ISSUE NO. 313 (ADOK 313)

DIMAPUR

TENTONÜ (MONDAY)

LUROI (AUGUST) 26, 2024

₹ 5.00

Kohima nung 'Temporary Red Zone' sangdoktsür

Dimapur, August 25, 2024 (TYO): 14 buba Nagaland Legislative Assembly pungububa session agitsü aliba atema Kohima nung ktdangsurtemi security maparen akangshio.

Assembly session agidang Assembly Secretariat Complex aser kilometre 1 temeket nung unmanned aircraft system

mamshitsü atema "Temporary Red Zone" metetdaksüogo.

Ministry of Civil Aviation's Drone Rules 2021 nung ajemdaker August 26, 2024 nikongdang 5:00 ako nungi August 28, 2024 nikongdang 5:00 ako tashi iba tenokdangba agütsür ta Kohima Police-i metetdaksü.

Kisama heritage village tajungba yanglushir

Dimapur, August 25, 2024 (TYO): State sorkari Naga Heritage Village Kisama ya world-class heritage tesem ka kümdaktsütsü tenangzükba yur inyaker ta Tourism Minister Temjen Inna Along-i ashi.

Hornbill Festival tenzükertaküm küm 25 ajungba atema Kisama yanglushiba mapa tenzükogo.

Hornbill Festival ya December 1-10 tashi Naga Heritage Village nung amongtsü.

Hornbill Festival ajanga Naga kintem sobaliba, inyaksangshi aser kentenmenü sayur aser iba ajanga telongjem adokdaksür ta Inna Along-i ashi.

"Chief Minister Neiphiu Rio lenisüba kübok Hornbill Festival tajungba mongyonga arudar. Maneni Chief Minister SC Jamir-i iba benjung atema tamendakdak

yanglua yutsüba atema pa danga pelar" ta pai ashi.

Kisama nung tang teinyakdak mapa rongnung tongtipang kaji modern amphitheater lir aser iba nung nisung 7,000 tema amentsü akok.

Hornbill Festival mapang traffic timtem ajuruba atema Minister Along-isa traffic aser home department tsungda amalitepa traffic timtem ajema akümtsü ta ashi.

Yaküm Hornbill Festival nung nisung 150,000 tema aden aser Tourism Department-i taküm iba dang nungi tourist teimba arutsü imlar.

Hornbill Festival 25 buba benjungmong nung Wales-i country partner ama shilem agitsü aser iba ajanga international jenjang nung benjung tali mera akettsü.

Nagaland nung Aug 29 tashi tzünglu arutsü

Dimapur, August 25, 2024 (TYO): Nagaland nung August 29, 2024 tashi district ajunga nung tzünglu arutsü ta Nagaland State Disaster Management Authority (NSDMA)-i metetdaksüogo.

Iba mapang Chumoükedima, Kohima, Longleng, Mokokchung, Mon, Niuland, Peren aser Wokha nung tzünglu kanga arutsü imlar. Tanungba district tem nunga tzünglu terara arutsü ta NSDMA-i ashi.

Kohima dena district Headquarters kar aser tanga tesem kar nung anentsüh alutsü akok anungi public infrastructure anepaluba line departments repringshima alitsü metetdaksür ta NSDMA-isa ashi.

Nagaland nung Dimapur, Nuiland, Chumoükedima, Bhandari, Pangti, Tizit aser Tuli dena tenemtsünglen aliba tesemtem nung tzümtsüng timtem ajurutsü akok ta pamokisa ashi.

GPRN/NSCN-i Collective Leadership pusemer

Dimapur, August 25, 2024 (TYO): August 14, 2024 nü 78 buba Naga Independence Day amongba den külemi Naga Regions ajak nungi GPRN/NSCN-i Collective Leadership pusema nungitsü bangjemtepogo ta MIP, GPRN/NSCN sangdong ka nung metetdaksü.

GPRN/NSCN züngsemtemi Major (Retd.) R.M Lotha President, Chennyeim Konyak Vice President, N. Kitovi Zhimomi Ato Kilonser aser Jungshiwati Ao, Deputy Ato Kilonser nung lenisüba pusemstü bangjemtep ta MIP-i ashi.

GPRN/NSCN Naga region ktdangpurtemi collective leaders pusemstü aser November 17, 2017 nü India sorkar aser WC, NNPGs tsungda sign sütepa Agreed Position sülen noktaksü telemteba agiogo.

Yimjung aser putepa alitsüba den Naga lanurtem tarutsü

jenjang tajungba kümdaktsütsü atema parnoki iba bangzüng renemogo ta MIP-isa metetdaksü.

Naga Regions ajak nungi ktdangpurtem:

1. Seyei Angami (RAO. Angami Region)
2. Wapang Ao (Supervisor. Ao Region)
3. Mongnei Konyak (RAO, Konyak Region)
4. Lulin (Supervisor. Kuki Region)
5. Heto Kiba (RAO. Sumi Region)
6. Pulang (RAO. Khiamniungan)
7. Renben Lotha (RAO. Lotha Region)
8. Kuhoto (RAO. N.S.S.R)
9. Hamnyei Phom (RAO. Phom Region)
10. KhaseoSangtam (Supervisor. Sangtam Region)
11. HevitoYephthomi (Chairman. UT-1) and
12. Kiumusu (RAO. Yimkhiung Region)

Centre sorkar mapa inyaker tem atema Pension Scheme tasen tenzükert

New Delhi, August 25, 2024 (Agencies): Centre sorkari Unified Pension Scheme (UPS) tenzükogo aser iba ajanga centre sorkar mapa inyaker lakh 23 shi ajangzüktsü.

"Iba scheme tasen ya April 1, 2025 nungi tenzüktsü" ta Union Information and Broadcasting Minister Ashwini Vaishnav-i ashi.

"Tajemba agi küm 10 tashi sorkar mapa inyaker Unified Pension Scheme (UPS) kübok pension angutsü. Ajisüaka, iba scheme nung keta aliba tajangzük ajakbo tajemba agi küm 25 tashi mapa inyaker dang angutsü" ta Ashwini Vaishnav-i ashi.

"Iba scheme ya tang National Pension System (NPS) kübok inyaker aser NPS kübok Voluntary Retirement Scheme (VRS) agitsüpurtemi shimtsü akok. Tarutsü nung sorkar mapa inyaker UPS nung adentsü

mesüra madentsü shimtsü akok. Ajisüaka kodang sorkar mapa inyaker kati UPS shimdir ibaji tatembang asütsü aser joko tanga pension scheme-i melentsü makok" ta Vaishnav-isa metetdaksü.

UPS ajanga küm 10 bosa inyaker sodi agitem nem ita shia minimum pension Rs 10,000 agütsütsü.

Mapa nungi sodi angurtemi pa/la mapa nungi anentsü jakdang ita 12 nung average basic pay ngua aliba nungi 50% pension angutsü. Iba tajangzük ya küm 25 bosa inyaker atema lir.

Centre sorkari pension fund 14% agüja aliba nungi 18.5% tutsütsü saka sorkar mapa inyaker enokba nungbo mekongshitsü.

Pensioner ka asüba sülen par/ lar kibongi pension ngua aliba nungi 60% angutsü ta

Information and Broadcasting Minister Vaishnav-isa metetdaksü.

UPS kübok pension ya inflation den sendakteptsü aser All India Consumer Price Index for Industrial Workers (AICPI-IW) nung ajemdaker Dearness Relief (DR) agütsütsü.

Sorkar mapa inyaker kümsük tembanga inyakba sülen parnok gratuity den külemi lump-sum payment ka angutsü.

Iba scheme nung NPS kübok adenba tesüba nung sodi angurtem dena lir. Parnok nem Public Provident Fund (PPF) rates nung sen tetemlok den tesüba indang arrears agütsütsü.

UPS ya state sorkartemi agizükba benshitsü akok aser state ajunga nung iba inyakyim tenzükra NPS kübok sorkar mapa inyaker lakh 90 tema ajangzüktsü.

Hezbollah-i Israel dak tayang küpzüktsü merang



August 25, 2024 nü Lebanon nungi Hezbollah-i Israel tsütsü yokba drone (abelen) aser Israel jet fighter ajanga drone poksaktsüba (achiji) nung angur.

New Delhi, August 25, 2024 (Agencies): Lebanese nung telungpur telok Hezbollah-i Deobarnü rockets 320 tema Israel tsütsü khaloktsüogo. Taoba ita parnok commander Faud Shukr tepsetba tayang küpzüka Israel amak ta Hezbollah-i metetdaksü.

Hezbollah-i parnok amaktsü osang angashiba sülen tanep Lebanon anema pre-emptive strikes süogo ta Israeli defence ministry-i tanep metetdaksü.

Israel amakdang drones aika amshi aser Israeli sepai tesep 11 nung Katyusha rockets 320 tema khaloktsü ta Hezbollah-i ashir.

Hezbollah-i Deobarnep 5:00 ako nung central Israel tsütsü missiles khaloktsütsü ta metetba sülen Israeli jets 100 amshia Lebanon amak ta Israel Army Radio ajanga metetdaksü.

Lebanon kübok Qasimia nung nisung ka drone amshia amakdang kanga mejungi yiru. Iba sülen Khiam nung Israeli-i tayimtsütem amshia amakdang

nisung ka tepset ta Lebanon nung NNA news agency ajanga ashi.

Israel kübok Acre yimti nunga nisung kar yiruba osang angazükert.

Meron base aser occupied Golan Heights nung tesem pezü dena Israeli sepaitem tesep 11 amak ta Hezbollah-i metetdaksü.

Israel-isa Hezbollah rocket launchers meyirjang aika poksaktsüogo ta ashir.

Israel-i launch sites amak ta asübaji Hezbollah-i magizükert aser Israel anema tayang küpzükba mezüngbuba shilem takok ngua agiogo ta parnoki ashi.

Shia imam tasembuba Imam al-Hussein tepsetba atema ya Arbacen anogo lir aser iba ya pa tepsetba sülen anogo 40 ajungba lir.

Iba anogo ya taküm bendanga agütsüba atema amonger aser iba jagi parnoki tanü shimtet ta Hezbollah-i metetdaksüogo.

Tiyongtsü nung mapa inyaker Israeli aser Palestine

nunger pua aliba melentepa yimjung bener arutsü merangba mapang ka nung Hezbollah aser IDF tsungda rarar.

Lebanon nung United Nations peacekeeping force aser UN's special coordinator's office ajanga telok ajak dang cease fire alitsü ayongzükogo.

United States-i Israel pusema nungitba metetdaksüogo aser defence operations mashi ka nung Israel pusemstü ta shiogo.

"President Joe Biden tetuyuba kübok US ktdangsurtemi Israeli ktdangsurtem den maneni tongtepratepar. Joe Biden-i Israel aser Lebanon nung atalokba osang metetpelar" ta US National Security Council spokesperson Sean Savett-i ashi.

Hezbollah-i amakba ajanga Israeli defence minister Yoav Gallant-i linük nung ghonda 48 emergency sangdongogo.

Pai sensotem dang telok sentepa mekazütsü aser tejenokdak malidaki maotsü metetdaksüogo.

Cooperation Department inyakyim lepara reprangshiba senden amen



Department of Cooperation indang 12 buba review meeting alidang Commissioner & Secretary, Cooperation Department, Zarinthung Ezung-i shilem agiba noksa angur.

Dimapur, Luroi/August 25 (TYO): Department of Cooperation indang 12 buba review meeting ka RCS Conference Hall, Meriema nung mena liasü, kong Commissioner & Secretary, Cooperation Department, Kohima, Zarinthung Ezung-i sorkar tenzükertem temeden aser pei mapa tesendaktep indang jembia liasü.

"Itasen angutsü ya sorkar tenzükertem lir, saka asen mapa shidak inyaktüsü kasa asen khuret lir. Temeden aser maya ya külemi aor," ta pai ashi.

Ezung-i ketdangsürtem dang tatishitsü tajung sayua staff, administration aser sendaktepa aliba department tem den amalitepa inyaktüsü ajungshia liasü.

Department ajanga maparen asem nung temulung tali agüja rangloksü asoshi jembidang, ochishia aser mapa shidak inyaktüsü atema Primary Agricultural Cooperative Societies (PACS) computerize asütsüla, financial health tajungba kumdaktsütsü aser

shidak inyaktüsü atema Nagaland State Cooperative Bank (NSCB) den lungjemer recovery drive aotsüla aser inyakyim shidak inyaker meinyaker aser temzüng ozüing sülen shidak anidaker asü masü ta jangjatsü atema Cooperative Society tem audit junga agitsüla, ta pai ashi.

Thungchanbeni Patton, Joint Registrar of Cooperative Societies (RCS), Head Office ajanga 11th review meeting nung renema alibatem zünga senden ya tenzükertem aser iba mapang paia department indang policy aser nukjidong takok ngua inyaktetsü atema lungjemer inyaktüsü ayongzüka liasü.

Iba sülen district balala nungi ketdangsür temi pei district indang osang agüja liasü. Imsunungsang, Deputy Registrar of Cooperative Societies (DRCS), Head Office ajanga May 1, 2023 nungi August 16, 2024 tsüngta recovery status indang osang agütsü.

Pai district representatives tem dang tarutsü nung results

tajungba alitsü asoshi meranga inyaktüsü ajungshia liasü.

Iba sülen Imnanukshi, Joint RCS, Head Office ajanga audit status aser district ajunga nung mapa meinyaki aliba Primary Cooperative Societies tem thitsüba indang osang agüja liasü. Paia item tesemtem nung terenlok kanga nungdaker ta shia liasü.

Cooperative society tem tali tajungba kumdaktsütsü atema data amshitsü aser policy yanglutsü nukjidong nung Ministry of Cooperation ajanga tawa national database tenzükba indang Akangjongshi, DRCS, Head Office ajanga lemsatepa liasü.

R. Bendang, Joint RCS, Head Office ajanga sentong tasen tenzüksü aliba indang rateta ashi aser sorkar indang department balala den lungjemer cooperative sector tashi itshitsü indang lemsatepa liasü.

Iba review meeting nungya Nagaland kübok district ajunga nungi ketdangsür aser teshimtet nisungtem dena liasü.

GPRN/NSCN ajanga ketdangsür ka mapa nungi anentsü

Dimapur, Luroi/August 25 (TYO): Sorkar tenung menüksüba atema Moatoshi Tzudir, Kilonser (Keeya Affairs) GPRN/NSCN züngsem nungi jentoker, ta N. Kitovi Zhimomi, ato kilonser,

GPRN/NSCN sangdong ka ajanga ashi.

Anungji, sorkar wazüka ayutsü mechi aser party discipline Section -A (clause-1&2), Section-C (clause-4) & Section D (clause-1) nung mela

aliba ama tanü August 24, 2024 nü nungi Moatoshi Tzudir (Kilonser), NSCN party züngsem nungi jentoker. Iba totuyuba ya totuyuba agütsüba anogo nungi mapa kuma inyaka aotsü, ta sangdong ajangasa ashi.

Pungro nung community awareness program agi



Dimapur, Luroi/August 25 (TYO): District Disaster Management Authority (DDMA), Kiphire ajanga 12th Battalion of the National Disaster Response Force (NDRF) den lungjemer August 24, 2024 nü Pungro Village Council Hall nung Community Awareness Program ka ayongzüka liasü.

telangzüba agütsütsü asoshi nüburtem nem angatetdaksütsü nukjidong nung iba sentong ya ayongzüka liasü.

Iba sentong nung Vongti, New Vongti, Jenny, aser Tekevong yimtsüngtem nungi VDMA densema stakeholders tem, lanur aser tetsür telok nungi teshimtet nisungtem, kaketshir, Nagaland Village Guards aser Arogo tenzükertem dena liasü.

Alimar yimya mesüra nisungi yangluba lendong timtem nung nüburtem renema alitsü aser yariteptsü asoshi asendenshitsü merangba nung shilem ka ama iba sentong ya ayongzüka liasü.

Sentong nung 12th Battalion NDRF ajanga emergency response techniques indang demonstrations aser training agüja liasü.

Dimapur nung mejangjaba nisung tasü mang ka nguteta lir

Dimapur, Luroi/August 25 (TYO): Platform No.01 Khatkhati end tsütsü arishi küm 25-35 tsüngta tain tebur tasü mang ka lir ta Station Master, NF Railway, Dimapur ajanga August 25, 2024 anepdang 3:00 ako meta tezüluba nung osang ka Dimapur Police nem agüja liasü.

ajak tembangba sülen tasü mang ya PM examination aser jangjatsü atema District Hospital Dimapur morgue nung bener oa lir.

Iba nisungba ya jean pants sentsü tanen den temtangbosa tula aser azük ka nung kangki keter tekong nung inoka liasü.

Iba dak sendakba nung kibur/kinunger/tembar temi Officer-in-Charge, Govt. Railway Police Station, Dimapur den Mobile No. 7085055021 ajanga tongteprateptsü akok, ta sangdong ka ajanga ashi.

Iba osang aruba sülen GRPS duty party arsanga iba tesem bushia ao aser non-local nisung ka Platform No. 01 Khatkhati end tatemlen süa aliba ngutet. Ozüing agi mela aliba maparen

GPPK pur Balidan Diwas mungogo



Deobarnü Kohima nung Gorkha Public Panchayat Kohima (GPPK) ajanga Balidan Diwas (Martyrs' Day) ayongzüka amungdang tangokba noksa ka yangi angur.

Kohima, Luroi/August 25 (TYO): Major Durga Malla aser Captain Neikezakho Kenguruse nati linük asoshi takum bendanga agütsüba bilemteta August 25, 2024 nü Gorkha Public Panchayat Kohima (GPPK) ajanga Community Hall, Chandmari, Kohima nung Balidan Diwas (Martyrs' Day) munga liasü.

Paisa sentong nung adenerem dang lokti ajungtsü atema bendanga agütsür inyaktüsü ayongzüka liasü.

Tetushi tesemdanger ka ama jembidang Superintendent of Police, Kohima, Bharat Laxman Markad-i ashiba agi, linük asoshi takum bendanga agütsür ana ya tesem aser kin balala nungi süaka parnoki bendanga agütsüba ajanga arok nukjidong aser linük meimba nung lungjema aliba sayur.

Parnoki linük asoshi bendanga agütsüba ajanga India lenla ajaklen yimchijungba nung yaritsü imlar, ta pai ashi.

Major Malla yagi India nung nuchiso asoshi August 25, 1944 nung pa takum bendanga agütsü aser Capt Kenguruse, MVC (posthumous) yagi June 28, 1999 küm Kargil War nung pa tekum bendanga agüja liasü.

Paisa sentong nung adener tem dang bendanga agütsür asür temi aginüba ama linük kumdaktsütsü asoshi inyaktüsü ayongzüka aser ibaji parnoki takum bendanga agütsüba asoshi tenüngsang tulutibaji alitsü ta ashi.

Iba sentong nung alakteta jaoker ama Angami Public Organization (APO) tir Thejao Vihienuo aden aser pai nisung meimchir puti otsü ya nüburtem aser kin balala tesem ka nungi tesem ka nung lia senzüba agi sünga lir, saka tongtipangtibaji yimjung nung külemi aliba ya lir, ta ashi.

Sentong nung GPPK Advisor Ranjeet Lama-i Maj Malla aser Capt Kenguruse indang otsü tongmelang agi lemsatepa liasü.

Gorkha nung aser Kohima nung aliba nüburtem mapang talangka nungi külemi liyonga arudang mepetmesü kecha maliba atema pelaba lemsatep aser Tsütuonuomia (T Khel) Council dak dangar dang temeim sayuba tanüla aliba aser Gorkha nungeri Kohima jila terenlok nung shilem agiba atema APO tiri tenüngsang agüja liasü.

Iba sentong nung Capt Kenguruse tsürabortem, Northern Angami Public Organization lenirtem, T Khel Council, T Khel Youth Organization, T Khel Students Union aser KMC Council Ward No. 13 (Lower Chandmari) Asangla Jamir nungertem dena liasü.

Gorkha nung tasü tait aser tashi angaba mulungjang dener Kohima-i aru aser tang aliba lanu putu-i iba yimya maneni amshitsü imlar, ta Vihienuo-i ashi.

Sentong nung Gorkha Students' Union Kohima vice president Jenny Lamechane menden liasü, aser asür nem akhum agüja milen tsükloka aser naro inokja sentong tenzüka liasü.

Linük asoshi takum bendanga agütsür ana nem tenüngsang agüja jembidang, linük meimba nung temulung ulushitsü aser lokti aser nübur tenzükba nung tali bendanga agütsüshitsü atema iba ama anogomung ya kanga tongtipang lir ta pai ashi.

GPPK tir Santu Thapa-i pela agizükba o jembi aser Vivala Club ajanga pela agizükba ken ka aser Priya Baraily-i temeja ken ka aten aser GPPK general secretary Suresh Kumar Lama-i melepzüng o jembia sentong tembangba liasü.

Pakistan-i SCO senden atema Ato kilonser Narendra Modi jaoker

New Delhi, Luroi/August 25 (Agencies): Pakistan-i Ato kilonser Narendra Modi densema Shanghai Cooperation Organisation (SCO) nung lenirtem Council of Heads of Government (CHG) senden nung adentsü atema jaokogo.

SCO lenirtem senden ya Pakistan nung taküm October ita nung agitsü. Iba senden nungji Ato kilonser Modi-i madentsüa akok, ajsüaka pai pa melen Minister ka yoktsü asü meyoktsüar tang tashi nungbo memetet.

Pakistan o India na tesendaktep kanga majung, ibayongji taoba mapangtem nunga Modi-i pa melen tongti ketdangsertem dang yoka liasü.

October 15-16 anogotem nung Pakistan chairmanship nung CHG senden amentsü. SCO sendentem nung Modi-i dena arudar saka taküm July ita nung Parliament senden aliba ajanga Kazakhstan nung ayongzükba senden nungbo pai medeni liasü.


Yaküm Bishkek nung ayongzükba CHG senden nunga India tenüng nung Foreign minister S Jaishankar-i shilem agia liasü.

Russia aser China nati aniba telok nung ya India aser Pakistan naprongla züngsem lir, aser region nung security aser Central Asia nung aliba linüktem den amalitepa inyakba

tsütsü India ya tongtibang linük ka ama züngshir.

India aser Pakistan naprongla densema inyakba telokji SCO ya dang lir. SCO sendentem nung adentsü atema India nung ketdangsertem Pakistan-isa ogo. Yaküm India nung ayongzükba SCO Foreign Minister tem senden nung adentsü atema taoba mapang Pakistan foreign minister, Bilawal Bhutto Zardari-ia India semdanga liasü.

Iba telok nungbo India aser Pakistan nati amalitepa inyakteter, kechiyong SCO Charter kübok iba senden nung linük ana tsüngda onüktem benoktsü memelar.



August 25, 2024 nü Patna nung All India Muslim Personal Law Board züngsem, Maulana Anisur Rahman Qasmi (tiyong) densema lenirtemi osangbenertem senden ka nung Waqf (Amendment) Bill 2024 indang jembidang tangokba noksa nung angur.

Ozü party-i linük nung caste census pusemer: Chirag Paswan

New Delhi, August 25 (Agencies): Amongnü Union Minister, Chirag Paswan-i, linük tesem ajaklen caste census agitsü atema par party-i pusemer, kechiyong ibaji ajanga loktiliba nung tekübok jenjang nung aliba nüburttem nem scheme tajungba agütsütsü atema mapatong renemba nung sorkar yaritsü, ta ashi.

BJP-i aniba NDA teloktep sorkar nung densema aliba party, Lok Janshakti Party (Ram Vilas) nung tongti lenir, Paswan-i, "Ozü party-i caste census pusemer ta teti jembia arur. Onoki caste census agidaktsüner. Kuliji ibai lir- state aser central sorkartemi aiben caste nung ajemdaker terenlok

mapatem atema asalentong yanglur. Item schemes ji item ama nüburttem ajungkettsütsü nükjidong nung yanglur. Iba ama mapang ka nungji sorkari linük nung caste shia nütüng kwi aliar ibaji metettsü nungdaker," ta metetdaksü.

"Item ama osangji meteta alitsüla, ibaji ajanga dang resources shidak lezmüktsütettsü. Item ama castes ajungkettsütsü atema sorkari item nütüng yongsükji nungdaker," ta pai ashi.

Opposition party temi linük tesem ajaklen caste census agitsü atema Centre sorkar dang akhangba mapang ka nung Chirag Paswan-i iba o ya jembio.

Congress lenir, Rahul Gandhi-ia, linük nung sempet liaka aser teka mapa balala meteta liaka nütüng shilem 90 bo mezüngoker, anungji caste census agitsü nungdaker, ta jembio.

Ano külen Union Minister, Giriraj Singh-i, caste census ji paidoktsü makok aser Ato kilonser Narendra Modi-i mapang tetemsü nung iba atemaji inyaksü, ta metetdaksüogo.

Singh-isa, Karnataka nung Congress sorkari tang tashi state caste census mesangdonger, süra kechiba Rahul Gandhi-i linük nung caste census agitsü maneni akhanger?, ta asüngdang.



August 25, 2024 nü New Delhi nung Congress, Samajwadi Party, AAP aser JD(U) densema party balala nungi lenirtemi Palestine nung pusemba senden ka nung adendang tangokba noksa nung angur.

Kathy Giles-Diaz-i Kolkata nung U.S. Consul General mapa agizükogo



Kathy Giles-Diaz

Kolkata, August 25 (Agencies): August 21 nü Kathy Giles-Diaz-i Kolkata nung U.S. Consul General mapa agizükogo; lai Melinda Pavak melenzüker, ta sangdong ka ajanga metetdaksü.

Consul General ka ama Giles-Diaz-i U.S. diplomatic mapatem achayangtsü aser Kolkata Consular District nung U.S.-India tesendaktep tajungba akümtsü atema lai inyaksü.

Kolkata Consular District ajanga West Bengal, Bihar, Jharkhand, Sikkim aser northeast India nung aliba state tenet ayimjemer.

Consul General Giles-Diaz-i, "East aser Northeast India

nung United States atema inyaksü maongka anguba ya akhüm tulu. Kolkata Consular District kübok state 11 nung aliba nüburttem ajurua U.S.-India partnership tajungba akümtsü atema inyaksü ni yongyar," ta metetdaksü.

Iba jakdang la ya Brussels, Belgium nung amenoka aliba U.S. Mission to NATO nung Public Affairs Advisor inyaka liasü. Tamalen la State Department's International Media Office Director aser Riga, Latvia nung amenoka aliba U.S. Embassy nung Public Affairs Officer inyaka liasü.

Laisa Tokyo, San Salvador aser Washington D.C nung menden balala nung inyaka aruogo.

Giles-Diaz ya tamalen television news producer ka liasü aser lai International student exchange program-a ka ketdangsüa liasü.

Form No. 3
[See Regulation-15 (1)(a)/16(3)]
DEBTS RECOVERY TRIBUNAL
GUWAHATI
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)

Case No.: OA/202/2024

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No.: 4337

HDFC BANK LTD
VS
Md. AMIR HUSSAIN & Anr
TO,
(1) MR ZAKIR HUSSAIN D NO (2)
S/O ABDUL MATIN CHURCHES COLONY
DIMAPUR NAGALAND NEARBY
DIMAPUR MISSION SCHOOL
DIMAPUR, NAGALAND-797712

JAOKER
25/07/2024 anogo nung Hon'ble Presiding Officer/Registrar matsügdang OA/202/2024 benoka liasü. Rs. 3991210.00/- sentsüh atema iba Act kübok section 19(4) application nung ajemdaker na anema (OA) benoka Hon'ble Tribunal-i jaoker/notice agütsür (application den documents copies densema lir).

Iba Act nung section 19 kübok sub-section (4) nung ajemdaker defendants dang teküboklen aliba tetuyuba agütsür:-

- (i) Iba case defend asürtemi tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji saytsü metetdaksür;
- (ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;
- (iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;
- (iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;
- (v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla.

Nü dang tezüluba nung sangdong applicant nem agütsütsü tuyur aser 30/08/2024 anogo nung anepdang 10:30 ako nung Registrar matsügdangi arutsü tuyur, yamaji meinyakra application ji angadangtsü aser na meliaka teletmetba agitsü.

30/07/2024 anogo nung tsünglanglen kü meyonngem den iba Tribunal indang seal agütsür

Note: Menüngdakba indokang
Signature of the officer
Authorised to issue summons.
Registrar
Debts Recovery Tribunal, Guwahati

BJP aser INLD nati Haryana nung election anogo atsülangtsü mepishir

New Delhi, August 25 (Agencies): Brihostibarnü Haryana BJP Tir, Mohanlal Badoli-i shidi ka ajanga Election Commission dang assembly election anogo atsülangtsü mepishiba sülen Honibarnü INLD lenir, Abhay Chautala-ia Election Commission dangi shidi ka zülua election anogo atsülangtsü mepishio.

Badoli aser Abhay nati EC dang, hopta tembangba sülen sodi anogotem lir, anungji voters aika pei constituency nung malitsüa akok, anungji election anogo atsülangdaksüner, ta mepishi.

Chautala-i election commission dang, election anogo memelenshira voters shilem 15 nungi shilem 20 tashi ajemtsüa akok, ta metetdaksü.

Election agitsü anogo October 1 ji Mongolbar lir aser October 2 anogoji Gandhi Jayanti sodi anogo lir, anungji nisung aikati Hombarnü (September 30) sodi agir pei constituency nung malitsüa akok, ta parnoki metetdaksü.

Tawa Lok Sabha election nung Haryana nung Lok Sabha menden 10 nungi Congress-i menden 5 nung takok ngua liasü aser tang BJP jenjang tera mejungi lir.



TIR YIMYIM YIMOBILEM (EDITORIAL)

DIMAPUR TENTONÜ, AUGUST (LUROI) 26, 2024

Yimten telemtetba yakta agiadoktsüla

A tangji, akhi ama masü Naga yimten nüchiso bushir teloktem ya Naga nungertem asoshi meinprongtsüka kumogo. Ibaji Naga yimten nüchiso bushir teloktemi repringteter asü merepringteter ashitsü makok, saka kum ishika jakdang tesem balala nungi NSCN teloktem nübortemi aridokba nungi tenzüker tang Kohima nung aser Diphupar nung NSCN teloktemi inyakba tashiyim mapatem anema nübortemi yimjak nung alimai meteta yimyim ayimba mapatem yagi nübortemi Naga yimten nüchiso bushirtem dak temulung meleme kumogo ta sayur. Aji oda, nübortem asoshi yimten nüchiso bushitsür ser nung nübortemiang yimten nüchiso bushitsürtemji anemtsüsa kumra, idakji Naga yimten nüchiso bushiba tongpang chireper asütsü. Iba ama tensa mapang mejungi aobaji Naga yimten nüchiso bushir teloktemi dang masü saka Nagaland Legislative Assembly nung amenertemi dena repringteta, tang ya India government den tejembitsü ka jembir telemtetba agiadoktsü kanga nungdaka kumogo. Asenok Naga nungter tebilemba atongtsü len talangba talangba kuma aoer dang ashi, India government tebilemba aser nükjidongbo kum shia atalokpet ataloka odagi. Aji oda, Naga nungter yimten ka kubok alushi ajak ka kuma longjemtsü meranga alidang, Nagaland agiang ana akumtsüsa atalokba aser NSCN telok paikaya kuma lemsadaktsür, parnok ajak nem kasasa jenjang agüja yimjung nung pei sünütsüsa lidaktsüba ajak ya tapi agi ataloker masü saka kari sentong yangluba agi ataloker. Iba jagiang, India ato kilonser Narendra Modi-ia tangbo pa bang nungi Naga yimten tebilemstü indang ojang ka ta madoker aser Nagaland anasaia marur. Aji oda, Naga yimten nüchiso bushir telok paikaya aser telok shia president aser prime minister lir. Item rongnungji shiba den jembir shiba den mejembitsü ? Iba tia nung koba telokibo Naga nungter ajak tenung nung India government den nümadanga oa jembitettsü ? Iba ama Naga nungter benjatepba ya ngur, ashiko India government-ibo parnok bilembabo tongogo ta aser 'Framework Agreement' aser 'Agreed Position' ta asüba Naga yimten ken o kakettepba ajak shibangdoker asütsüa akok. Atangji, Naga yimten nüchiso menguaka, Naga yimten nüchiso bushirtemi ochi nung takum ajak bendanga agüja Naga yimten nüchiso asoshi nokdak tashi, India-i Naga nungter kanga akhümtsüba liasü, iba jagi Nagaland state-a dena center government-i kanga temulung agüja zungshia aruogo. Aji oda, Nagaland nung yimsürtemi Delhi nung alir koka jembitettsüba onükji Naga yimten tebilemstü onük ya dang liasü. Ajisuaka, tanübo Naga yimten tebilemstü ya bener oa Delhi nung jembitsüla onük ka masü kumogo, kechiyong Naga yimten nüchiso bushiba tebilemstü agi Naga nungter o Naga nungter na tebilemstüang kumogo. Aji oda, Nagaland tesem ajaklen Naga nungter nüchiso bushir telok ka mesüra ka anema nübortemi ola adoker aser police nema pua yudaktsür ta asüba tensa tia ka nung, India den asenok kechi ken o bener oa jembitsü ? Iba ama asenok kodamasüba tensa tia ya meteta, Nagaland government-i tentetba Political Affairs Committee-ia tenung agidang 'facilitator' ka dang ta jembipet jembia mekazüi Naga nungter ajak ayonger shisalemtepa asen tensa mapang dak apet yimten telemtetba ka agitsü nungdaker. Kasaji, Naga yimten nüchiso bushirtema, Naga yimten nüchiso bushia bushia Naga nungtertemi nüchiso-ang magili ta ashitsüsa masü, tang ya memenu dang tangatetba kati arua India den telemtetba ka agitetsüsa pei nübor, Naga nungtertem dang nungi shisatsü aser temoatsü agitsüla. Iba amaisa oa-oa asenok o asenok na meputep kümer, pei nübortemiang Naga yimten nüchiso bushirtem makdoktsüsa kumra, ibajibo alima tsungdang Naga nungter ajak asoshi maksü tuluka asütsü aser Naga yimten nüchiso asoshi senti takum tenla agütsürtem mapa mezungmeshir asütsü !

OLEMSABANG

BENDANGLN RANGLOKDANG ATEPZÜNG NUNG LANUR AIKA SAMADAGI

~ L.Kika Pongener.

Tanü Ao Mungdang-i anir lim arogotemi rongsen jenti endoka asen lima adena orr Arunachal, Plain Karbi, Bhutan, Nepal, Myanmar, Cambodia, Thailand aser China tashi awa-a oa Mission Field lapoka osangtajung tenyaba mapa tulu inyakba ngua tamanger ajaki kanga temulong chia bilemer. Ano mungdang aser arogotemi dang masü, kija aser kibongtem-ia rongsen jenti endoka tenyaba mapa inyakba ngua kanga pelaseta bilemer. Dr. Clerk-i asen limai Yisu yimsu osang tajung bener arur joko kum-150 dak tali sua aor, anungji asen meküta aliba kintem tang osangtajung sayutsüngibaji khristar arogotem asoshi tongtipangtiba mapa ka lir, aser arogotemi pei pei akok Mission mapa inyaktsübaji Yisu-i tamangertem nem nungloktsüba teinyaktsü mapa tongtipangba ka lir. Ajisuaka, asen lima adena orr asen meküta aliba kintem dak kija rangloker mission mapa inyaktepdang, tesusatsüka, asen atepzüng nungbo ano meinyakjempa wadang tongtipang karbo lir amai repringteter, aser itemji mapang memenu dangsa tim teinyaktsü meinyaki-i toktsüra, iba jagi asung yimden, arogo aser loktiliba asoshi tebilemstü khuret aser tekolak menutsü bentsür arutsü ana nung lir amai kanga temulung ayanga repringer.

Mungdang aser lim arogotemi mission mapa inyakba inyakyim ya tera repringshitsü kar lir amai ajiteter. Tanü tashi mungdangi anir lim arogotemi koba lima nungsa Mission Field lapoka oa teinyakdak lir, itemji takok ngua inyaktsüla, ajisuaka, ano asen atepzüng meshi-meshia senzuka metoktsüi khen meyipa repringtsüla lir amai khuretsa bilemer. Tanü asen lima yimtsüngtem nungi shir jila ajak nung Aotsür Aor lanurtem zünpet-züngrar (School & College drop-outs) aser zünger mapa mangur (Educated un-employed) aika kumadokogo. Ano item dak alaka, lanur aika mozü-lar, yi-lar kümer temeimtsüka lir, aser aiurtem karbo mapa manguba agi pei teküp yoka alirtema alitsü sudi. Item lanurtemji mapang shidak nung sentong kar atonga mapa kar meinyakra, asung asen lima asoshi tebilemstü aser tekolak menutsü bentsür arur telok ka akumtsü. Shidakba jembidi sura, iba ya sorkar tebilemstü khuret lir, saka tanü asen sorkar nung yimsusurtemi yimjak nung tejak meia yimyim ayimoktsüba dak alaka, lanurtem atema mapa agi inyakba aikabo mangur. Shidakba agibo sorkar-i item lanurtem asoshi suoki yia bilema, sentong tapu balala atonga senotsü endok mesasai inyaktsüla. Surabangla, sorkar-ia item lanurtem asoshi sentong tajung kecha madonger aser senotsüa meintoker...ta zübazüba toktsüra, odang repringa lia asen lanurtemji raksadaktsütsü asü (?) Mesura tanga lokti-tentet Non Governmental Organisation (NGO) kari danga sentong tajung kar atonga inyaktsü (?) Mesura arogotemi danga senotsü endok mesasai lenmang kar bushia, sentong kar atonga inyaktsü (?) Tang asen lima nung NGO-tem rongnung senotsü peria akaba lokti-tentetji arogo ya tang asütsü, aser inyakdi ta mulongtetra arogo-ibo inyaktetsüsa tashi lir aser rongsen lir.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

UCF-i UP nung anti conversion özüng anema temepishiba agütsü



August 19, 2024 nü Uttar Pradesh yimtiba, Lucknow nung United Christian Forum (UCF)-i osangbenertem senden nung jembidang tangokba noksa nung angur.

August 25, 2024: New Delhi nung amenoka aliba United Christian Forum (UCF)-i Lucknow yimti nung Uttar Pradesh Angh, Anandiben Patel nem temepishiba shidi ka agüja Uttar Pradesh Prohibition of Unlawful Conversion of Religion (Amendment) Bill, 2024 atema tebilemstü akaba lemsatepogo.

UCF-i, iba özüng tasenba ajanga tamangba yimsü meyipdaksüba atema ano tesashiba inyaksü aser Khristantem densema minorities taliba amokmerentsü mesüra reshikangshitsü, ta metetdaksü.

shidiji Angh ket tongtsütsü ta shiogo,” ta metetdaksü.

August 19 nü Angh nem agütsüba shidi nungji UCF-i tang state nung aliba anti-conversion özüng aser iba özüng tasenba dak sendakba tebilemstü onüktem shia lir.

Khristantemisa, özüng tasenbaji ajanga nija aser yimsü alia amanger teloktemi Khristantem densema minorities anema inyaksü, ta metetdaksü.

Tebilemstü onük tulubaji, özüng tasenba kübok nisung mashie kati nisung ka anema ken o benoktettsü; nsiung mashie kati nija, yimtenren mesüra yimsü nung ajemdaker minorities anema ken o benoktettsü, ta UCF-i metetdaksü.

Legal research telok ‘Article 14’ indang report ka nung ajemdaker UCF-i, Uttar Pradesh nung anti conversion özüng kübok benokba First Information Reports (FIRs) 100 asandangba ajanga iba ken o 63 bo third-party complaints nung ajemdaker benokba liasü aser ken o 26 bo yimsü alia amanger teloktemi benokba liasü, ta metetdaksü.

Item kuli balala nung ajemdaker UCF-i tang aliba Uttar Pradesh Prohibition of Unlawful Conversion of Religion Act, 2021 özüng agientsü takhangba agütsü.

Parnokisa 2024 Amendment Bill mebenoktsü mepishia metetdaksü.

Angh dangi züluba shidi nungjisa UCF-i linük nung yimsü balala amanger teloktem tsüngda tesendaktep tashi taitba akümtsü aser aremzükteptsü atema mapatong balala benoka inyaksü nüngdak, ta metetdaksü.

UCF-isa, linük sensotemi linük temzüng kübok sensotem nem yimsü temeden agüja aliba aser yimsü balala amangertem tsüngda akhümtsübutepstü atema sensotem nem awareness agütsütsü atema sorkari inyaksüla, ta metetdaksü.

UCF-i Raj Bhavan nung tongti ketdangser ka ket nung temepishiba shidiji agütsüba sülen parnoki osangbenertem senden ka ayongzüka jemb. Osangbenertem senden nungji Hindu, Muslim aser Khristan lenirtem jembia liasü.

Lucknow nungi pastor tem aika densema Khristan telok jagi August 19 nü Raj Bhawan-i Angh ajurui ao, saka parnoki la majuruteti liasü.

Ajisüaka parnoki shidiji ketdangser ka ket nung tokja la nem agüjang ta shiogo.

UCF National Coordinator, A C Michael-i, “Raksha Bandhan benjung aliba agi onoki la majurutet. Raj Bhavan nung tongti ketdangser kati onok ajurua onok tebilemstü onüktem angadangogo aser pai onok dang onoki agütsüba

Colombia nung lisopur telok ana atema Laishiba meyipzüktsüogo

August 25, 2024: Colombia linük nung joko lisopur telok anati pei oshi nung Laishiba züngtettsü, kechiyong parnok oshi nung Laishiba meyipzükmaogo.

Colombian Bible Society (CBS)-i Wayu aser Nasa nungertem oshi ‘Wayuunaiki’ nung Laishiba meyipzüktsüogo. Colombia nung lisopur nütstung shilem 32 bo Wayú aser Nasa nung lisopurtem lir, ta National Administrative Department of Statistics (DANE)-i metetdaksü.

Colombian Bible Society-i sangdong ka ajanga, “Colombia nung lisopurtem oshi wazüka yutsütsü atema onoki parnok den amalitepa inyaker, iba denji

külemi parnoki pei oshi nung Tsüngrem O züngtettsü atema inyaker,” ta metetdaksü.

Parnokisa Nasa Yuwe oshi nung Lai meyipzükba maparen inyakdar.

Colombia nung lisopur oshi nung Laishiba rangben (Tasen Lai & Tejen Lai) meyipzükbaji tang mezüng asütsü. Iba project atema küm 13 shi agia liasü. Laishiba meyipzükba maparen nung Laishirtem, lisopur oshi meyipertem aser oshi nung mongintemi shilem agia liasü.

Colombia nung Wayú nisungtem ya Guajira Peninsula nung lisopurtem lir; parnok ya talisa Colombia La Guajira aser Venezuela kübok Zulia state

nung alir.

Colombia nung lisopur oshi nung Laishiba rangben meyipzükba ya alizüng tuluka tongtetba lir, kechiyong ibaji ajanga Spanish oshi mashir nisung meyirjang aika ajangzüktsü.

Colombian Bible Society nung tongti, Alexander Gómez-i iba project tembanga inyakba atema pelaba lemsatepa, “Onoki kanga melung asür, kechiyong ibaji ajanga kija-kibongtem aser lokti nung temelenshi tulu adoktsü. Wayú nung aianutsürtem aser adianutemi pei oshi nung Tsüngrem O züngteta Tsüngrem temeim metetstü,” ta ashi.

ANOGO ABEN TSÜNGREM DEN

Tenüng Asangba Sempet

“Iba osangtajung asoshi ni ashikülaker ama talenba nung timatemer, saka Tsüngrem oji alena mali” (2 Tim 2:9)

Tsüngremi mulungba ataloktsü asoshi alima ajunga nung meremsepi aliba temoatsüji Laishiba lir. Shingai Tsüngrem oji lateta yutsütsü makok. Laishibai ama tanga kechaia kija taküm, kibong, lokti aser kin taküm nung mapa meinyaker. Putu ajak nung Tsüngrem o shibangtsü, telatet ka yutsütsü merangaka makoker. Iba nüchi Laishiba tashi samatsü makok.

Tsüngrem oji ain, aser ibai tazüngla nung meyipa marutsü ta Laishibai ashir. Saka Pauli iba osang tajungji sayuba ajanga pa rishikangshia merenshi, alena ayu, tepuokdak ayu, özüng raksar nisung ama züka merenshi, saka pai item timtem ajakji ola madoki arem. Meyiper pai Tsüngrem nem tenüngsang dang agütsü.

Pauli Tsüngrem o nungji ain tulu keta lir aser ibaji alima nung kecha tashi agia makoktsü ta metetbayong pai timtem aser tekangshi ajakji aremzük. Paul aser Sila na sayutsungiba asoshi tepuokdak merang yinzü agi alener ayuba mapang tenati jashia mesüra nemjema mebilem. Tenati tenüngsang ken dang aten. Süra asenok daka mapang ajak nung kasa tenüng sangtetba sempetji alitsüla ta iba lai o-i ashir.

Malaysia nung court-i Pastor Koh indang report meshir



Pastor Raymond Koh aser pa kinüngtsü, Susanna Liew

August 25, 2024: Pastor Koh samaba anema lai Brihostibarnü Malaysia nung benokba ken o dak sendakba High Court-i maneni sorkar nung iba temepishiba agütsübaji ketdangsertem dang Pastor Raymond Koh kinüngtsü, Küm pezü tejaklen Liew-i meshiba report agüjang aser pastor samaba osang tejangja agüjang ta tuyuogo, ta International Christian Concern (ICC)-i metetdaksü.

Justice, Su Tiang Joo-i, Fuzi Harun na den taoba mapang principal assistant director of Special Branch’s social extremism division, Awaludin Jadid nung tenüng densema lir.

Justice Su-i sorkar ketdangsertem dang August 15 nungi tenzüka anogo asem tsüngda report agüjang, ta obendang agüja liasü. Paise Malaysia sorkar dang court nung teindokba sen RM 3,000 February 13 nü pa kinüngbu

benokba ken o dak sendakba nung iba temepishiba agütsübaji tim dang, ta metetdakja liasü.

Küm pezü tejaklen Liew-i meshiba report agüjang aser pastor samaba osang tejangja agüjang ta tuyuogo, ta International Christian Concern (ICC)-i metetdaksü.

Justice, Su Tiang Joo-i, Fuzi Harun na den taoba mapang principal assistant director of Special Branch’s social extremism division, Awaludin Jadid nung tenüng densema lir.

Justice Su-i sorkar ketdangsertem dang August 15 nungi tenzüka anogo asem tsüngda report agüjang, ta obendang agüja liasü. Paise Malaysia sorkar dang court nung teindokba sen RM 3,000 February 13 nü pa kinüngbu

AO OSHI ANGAZÜKDAK: TANÜ ANGAZÜKTSÜBA OJANG



Tamangtsü

(adj) hau ta sütettsüba mapa aser o (credible)

* Sayutsüngiri Laishiba nungi tamangtsü o aika ashir.

Tamangu

(adj) meimlaba lendong (unexpected calamity)

* Sarasadem agi tamangu lendong nungi kümzüker.

OLONG PAITEP # 6906

Grid for OLONG PAITEP # 6906 with numbers 1-24 in a crossword pattern.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apilet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6905 TELANGZÜBA

TIPIEN :

- 2. Pongsen, 5. Lepko, 7. Omen, 8. Maangka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

NAI-A YA METETTER MA



Kerala kübok Kannur yimti nung arishi küm 4 tanur Shivamsh-i gari company 200 tema shitetba atema Time World Record ngutetogo. Shivamsh ya Kannur Premium English Medium School nung LKG student lir aser pai second 33 nung car logos 50 aser minute 1.57 nung car models 110 shiteta liasü. Pai car logos 100 aser car models 200 tashi shiteter.

Shivamsh arishi küm 3 asüdang nungi gari kanga meima aküm. La tetsü Sona ya Ursuline Senior Secondary School nung tesayur aser tebu Ranjith (ex-serviceman) nati pa dak iba sempet ya ajiteta liasü.

Mascut Hotel, Thiruvananthapuram nung sentong ka agidang Abu Dhabi Sahitya Academy chairman Abdullah Muhammad Al Mahasi-i Shivamsh nem Time World Records certificate agütsü.

Assam nung law & order tashi mait kümogo: MP Gaurav Gogoi

Guwahati, August 25, 2024

(Agencies): Assam kübok Nagaon nung tebur aikati tanur tetsür ka dak tashiyim agi shi nung medemba tatalokba atema süoki ia bilemer aser iba atema public jashir ta Congress MP Gaurav Gogoi-i ashi.

Iba ama mapang nung hospital staff aser doctor temi la tajungtiba agi anepalutsü

ayongzüker ta Gaurav Gogoi-i ashi.

"Tetsür lar kibong den külemi noktaker aser Nagaon nung alirtemi iba tesempatsü mapa inyaker tem ozüing tesashitüba agi merenshitsü akhanger. Tatalokba balala ajanga iba mapa inyaker tem süogo saka iba ajanga lokti dak kongshio" ta paisa ashi.

"Assam nung tetsürtem dak tashiyim mapa kanga inyaker aser iba ya state sorkari law & order tiptema meyutetba ajanga lir. Assam nung tetsürtem asoshi tetsübütsü tensa ka ajuruogo aser ozüingren den security maparen tashimait lir. Assam sorkari sensotem kümzüka meyuteter" ta Gaurav Gogoi-isa metetdaksü.

Tripura Congress-i special central relief package meshir

Agartala, August 25, 2024

(Agencies): Centre sorkari Tripura nung tüzümsüing ajanga takoksa bentsür aruba yaritsü asoshi special package ka agütsütsüla ta Tripura Pradesh Congress Committee (TPCC)-i takhangba agütsüogo.

Tripura tüzümsüing lendong balala nung nisung 26 tashi taküm samaogo.

"Tüzümsüing ajanga teraksa jenti bentsür aruogo. Yashi all-party meeting ka nung onoki Chief Minister Manik Saha dang state aser nübortem yaritsü tebilebatem lemsatepogo" ta

Congress MLA Sudip Roy Barman-i ashi.

"Tüzümsüing ajanga Rs 15,000 crore shi takoksa nguogo aser final assessment sülen teimba dang nungi teimba asütsü akok ta CM Saha-i ashi. Nisungtemi osettsüset kecha mekümsüktet aser takoksa tuluba ajururji aluyimertem lir. Onoki chief minister dang tüzümsüing asadangtsü atema central team ka yoktsü mepishiogo" ta pai ashi.

State sorkari Prime Minister, Union Home Minister mesüra Union Finance Minister den ajurutepa special package ka

meshitsü atema all-party delegation ka yoktsü akok ta Roy Barman-isa ashi.

"Prime Minister mesüra Home Minister-i alima lendong atalokba state tem semdang. Tesüngmangtsüka tanü Mann Ki Baat programme nung Tripura tüzümsüing mejembisem" ta paisa ashi.

Congress-isa Tripura nung district aser sub-division-level committees tenteta tüzümsüing agi teraksa bentsür aruba yanglushiba mapa inyaksü shidangogo ta Barman-isa shisem.

Sivasagar nung Rs 1 crore tema agia nisung ashioktsür ka apu

Guwahati, August 25, 2024

(Agencies): Assam Crime Branch-i Sivasagar nung nisung kati Chief Minister's Officer on Duty tenüng amshia nisung aika ashioktsür ka puogo.

Sivasagar kübok Simaluguri nung Kaustav Baruah apu. Pai Rs 1 crore tema agia nisung aika ashioktsüogo.

Baruah den pa tetsü aser kinungtsü nati Chief Minister's

OSD tenüng amshia nisungtem nem mapa aser contract agütsütsü nangzüker.

Baruah tetsü ya August 23 nü apu aser lai OSD den sendaktepa lir aser pa kinungtsü temang anepalutsü atema sen nüngdaker ta shia nisung 25-30 shi ka dang nungi sen lakh aika meshizüka agi.

Baruah tetsü dak temulung malemer kati la den ashishitepa

jembidang iba ozüing alema inyakba mapa putet.

Kaustav Baruah-i pa Chief Minister's personal doctor ta ashi aser pai hadir bener nisungtem amokmeren aser pa kinungtsü den külemi health department nung mapa agütsütsü ta tiyazü nangzüka sen meshizüka agi.

Iba dak sendakba nung Crime Branch-i maneni bushisingdang südar.

Indo-Myanmar arrtsü anasa Champai district nung Assam Rifles aser Mizoram police külemi mita aodang Myanmar sen aika apuba sülen agiba noksa angur. Parnoki Mualkawi nung gari ana soter mita reprangdang Myanmar sen Rs 2.25 crore bena aliba apu. Iba ya India sen nung Rs 93.10 lakh lir aser iba dak sendakba nung nisung 6 apu.



MOPUNGCHUKET VILLAGE COUNCIL

P.O. IMPUR - 798615, MOKOKCHUNG, NAGALAND

TENÜNGSANG AGÜTSÜR

Mopungchuket Medemsanger Putu Menden ajanga sensosanger shirnokisa tawa pei wadang balala nung alakteta takok ngutetogo, parnok ajak nem tenüngsang agütsür:

- 1. Wb. Temjen Aier, S/o Wb. Karimeren Aier: 15 August 2024 anogo "Governor's Award for distinction in Arts" khonang ajangzük.
2. Er. B. Akala, W/o Wb. Takatemjen Jamir: Personal Information & Management System (PIMS) takok ngua amenoktsüba atema Governor's Commendation Certificate angu. La Government of Nagaland kübok P&AR Department nung Sr. Computer Programmer (PIMS) teinyakdak lir.
3. Dr. Wapangnungla Longkumer, D/o Wb. Taliwati Longkumer: Lovely Professional University, Punjab nungi Mass Communication nung "The Role of Radio Broadcasting in Development: An Empirical Study of Nagaland" omen nung ajemdaker Journalism and Mass Communication nung Doctor of Philosophy (PhD) jenjang tongtet.
4. Kr. Yimsenna Jamir, D/o Wb. Chubanungba: North Eastern Hill University kübok St. Edmund's College nungi 2024 tatidang nung Economics nung tematiba jenjang 2 buba nung takok angu.
5. Kr. Tiani Longkumer, D/o Dr. Temjen Longkumer: Assam Don Bosco University, Assam nungi BA (Hon) Mass Communication nung Gold Medal angu.
6. Kr. Sungjemjungla Aier, D/o Wb. Sobuyanger Aier: St. Joseph's College (Autonomous), Jakhama nungi BA (Education) nung Top 4 jenjang nung takok angu.
7. Sp. Molungtong Ozukum, S/o. Dr. I Imlitemsu Ozukum: 2024-2025 Nagaland State-NEET (UG) tatidang nung MBBS jenjang 10 buba nung takok angu.
8. Kr. Ochien, D/o. Wb. T Tajenmeren: 2024-2025 Nagaland State-NEET (UG) tatidang nung MBBS jenjang 39 buba nung takok angu.

Wadang balala nung khonang aser takok angur ajak dang kümrem pelar aser tetushi tulu agütsür. Parnok wadang, taküm aser kibong nung Tsüngremi ano tali moajangma.

Sd/-

Akumjungba Chairman,

Mopungchuket Village Council

Sd/-

Arimolung Aier Secretary,

Mopungchuket Village Council

France nung Telegram CEO Pavel Durov puogo



Paris, Luroi/August 25 (Agencies): France indang police-i Paris north tsütsü airport ka nung Telegram Chief Executive Officer (CEO) Pavel Durov puogo.

Durov ya pa indang private jet Le Bourget Airport nung anenba sülen apu ta ashir.

Arishi küm 39 tain billionaire ya pa indang nüngtugu messaging app Telegram dak sendakba nung aibelenba mechi apu ta ashir. Moderators peria maliba mechi bushisüngdang asür, aser mapa tamajung inyaker temi Telegram amshiba azüoktsü atema Durov-i mera magi ta tai tongloktsür.

Temesepba mozü shibelenba, tanurtem den tim masüba mapa inyakba aser

ashikülak mapa inyakba atema ozüng amshirtem den amalitep makar ta tai tonglokja lir. Taoba mapang Telegram-i moderation peria lir ta shia liasü.

Durov ya Russia nung aso aser Dubai nung alir. Pa United Arab Emirates aser France indang senso bona lir.

Telegram ya Russia, Ukraine aser taoba mapang Soviet Union linüktem nung kanga nüngtugu lir. Durov-i user data agütsütsü memulungba mechi iba app ya Russia nung 2018 küm nokdanga liasü, saka 2021 küm tenokdanga sala.

Telegram ya Facebook, YouTube, WhatsApp, Instagram, TikTok aser Wechat sülen tongtipang social media sapang ka lir.

Durov-i Telegram ya 2013 küm yanglutet aser sorkari pa indang VKontakte social media platform nung opposition temi amshiba shibangtsütsü akhangba sülen manidakba sülen 2014 küm Russia yutsür ao.

Deobarnü France nung aliba Russian Embassy-i Durov den ajuruteptsü meranger ta shia liasü.

“P. Durov apuba osang angashiba sülen France ketdangsürtem dang pa apuba kuli jangjatsü asüngdangogo aser Durov temeden wazüka ayutsü aser consular access agütsütsü shiogo,” ta Russian Embassy ajanga Facebook nung zülüsü.

“Ajisüaka tanü tashi France ketdangsür temi iba ken o nung amalitep makar. Onoki P. Durov indang okatsürtem den jembir.”

Russian ketdangsür aikati Durov apuba aitsür aser iba ya ajanga West ya anatsü nok amai aliba sayur ta ashi.

Telegram nungya group ka nung züngsem 200,000 tashi liteter aser iba yongji osang tiazi kanga kera prokshir ta aitsür.

Israel-i southern Lebanon amak, Hezbollah-ia rocket khaloktsü

Beirut, Luroi/August 25 (Agencies): July tatemlen commander Fuad Shukr tepsetba atema telangzüba agütsütsü nangzükba ama telangzüba mezüngbuba shilembo takok ngua benoka inyakogo, ta Hezbollah-i ashi.

Kasa mapang nung Israel-ia Deobar anepdang parnoki southern Lebanon anüng ajanga amakba metetdaksüogo. Northern Israel amaktsü atema Hezbollah pur renema aliba lazükba sülen parnoki tesem kar maka liasü, ta ashi.

October ita Gaza nung rara tenzükba sülen Israel aser Hezbollah na arrtsü nung mapangshia raratepa aruda, saka tang rara ya tesashiba küma odar.

Hezbollah-i Israel amaktsü ta imla liasü, kechiyong Hezbollah aser Hamas telok nungi lenir tejentem tepsetba sülen joko hopta ka ana süia aoer. Item lenirtem tepsetba ya Israel dak tai tongloktsür lir.

Hezbollah puri ashiba agi, parnoki Meron base aser Golan Heights nung tesem pezü densema Israel indang military base aser barrack 11 nung Katyusha rocket 320 khaloktsüogo.

Telok ana ya joko mapang talang ka khatapa arudar, saka Deobarnü nü kati ka amakba ajanga rara tesashiba akümba sayur.

“Israel-i Lebanon nung timba arrtsü nung aliba tesemtem makogo,” ta Al Jazeera osangbener Zeina Khodr-i metetdaksü.

“Arrtsü anasa aliba tesemtem ya joko military zone ka kümogo. Item tesemtem azüngtetogo... ita ishika

tsüngda Israel army-i item tesemtem kanga adonga maka arudar,” ta osangbenerisa ashi.

Kasa mapang nung Israel-i ashiba agi, Hezbollah-i Israel amaktsü ghonda tesadang ka lia Israel-i jet tem amshia southern Lebanon nung Hezbollah pur indang launch sites meyirejang aika makogo.

Lebanon indang NNA news agency sangdong ka ajanga ashiba agi, Israel-i drone amshia amkba mapang Qasimia nung nisung ka kanga mejungi yiru aser Khiam jila nunga anüng ajanga amakba mapang nisung ka tepsetogo.

Israel indang Defence Minister Yoav Gallant-i, Deobar anepdang 6 ako nungi ghonda 48 tashi linük ajanga nung “special situation” ka benokogo.

Israel nung Ben Gurion airport Deobar anepdang khen atema shibanga ata liasü aser osang kar ajang ashiba agi, northern Israel nung nisung kar yiruogo.

Israel army-isa, northern Israel aser Golan Heights nung nüburtem nem tenokdakgba kar agütsüogo.

Ato Kilonser Benjamin Netanyahu-i ashiba agi, linük kümzüka ayutsü atema Israel mulungteter lir. “Shirnoki onok yirutsüdir onoki parnok yirutsütsü,” ta pai ashi.

Maneni Al Jazeera osangbener Khodr-i ashiba agi, Deobarnü Israel amakba ya tetenzüker dang ta Hezbollah puri shiogo, ajisüaka tanabuba shilem benoka inyaktsü kecha temaitsü mali.

Israel military-i ashiba agi, tangbo Hezbollah pur ya timba southern Lebanon nungdang maka arudar, saka koba tesem

ajanga parnok amokmerener item tesemtem ajak amaktsü parnok renema lir.

Taoba ita Tehran nung Hamas political chief Ismail Haniyeh aser Beirut nung Hezbollah lenir Shukr tepsetba sülen middle east nung mepetmesü tulu adoktsü ta linük aikati tsübua bilema aliba tali kümogo. Lenir anaprongla tepsetba ya Israel dak tai tongloktsüogo.

Israel-i tesem balala amakba ajanga parnok temeket nung aliba tesemtem ajak rara nung densemdakja rara tuluba akümtsü ana nung lir, ta Levant Institute for Strategic Affairs director Sami Nader-i Al Jazeera dang ashi, ajisüaka telok anapronglai rara tulu ka adoktsü aliba nungibo jenboa alitsü merangtsü akok, ta paisa shisem.

Kasa mapang nung United States-i Deobarnü sangdong ka ajanga parnoki Israel maneni nongita yaritsü, ta shiogo.

Tir Joe Biden-i tetuyuba agütsüba dak ajemdaker US nung ketdangsür tejentem Israel nung lenirtem den tanen makai tongtepratepa arudar, ta US National Security Council otongdar Sean Savett-i ashi.

Gaza nung rara tembangdaksütsü atema Egypt nung sensaksem ka ayongzüka agiba mapang Deobarnü iba lendong atalokogo. Hezbollah puri ashiba agi, Gaza nung rara anenra parnoki Israel den rara anentsü.

Ajisüaka tang tashi nung yimjung ososhi ken o tembanga jembishinü mesüteti arudar, kechiyong telok anapronglai pei tamendakdak nungi asetshitsü memulunger.

Office of the
Longsa Senso Mungdang
H.Q. Mokochung
METETDAKTSÜR

Longsa Senso Mungdang emergency Mungdang 14 September, 2024 anogo 10:00 am nungi tenzüka Longsa Lenden nung akatsü sangdonger.

Anungji Longsa Senso tepur küm ter ti (18 yrs) nungi tema ajak iba Mungdang nung atentsü jaoker. Senso shiba kuli tejangja makai metenlir/marulir Longsa Senso temeten nungi agientsü ta metetdaksür.

Sd/-
Wb. Noklenjungba
President
Longsa Senso Mungdang

Sd/-
Wb. Lanukumzuk
Secretary
Longsa Senso Mungdang

Office of the
Longsa Onger Salang
Mokokchung, Nagaland
SANGDONGER

Ao Milen Vol- III Adok(No) 2437 page-7 Dated 27 Nov, 2023 nung koba Longsa Onger Salang telemtetba sangdongogo, iba anema Mr. Aoshilu aser Mr. Tongpangkoba ajanga 20 August 2024 anogo Tir Yimyim osang kaket nung pei sasa nungja jateta koba Longsa Yimlang Senso Mungdang tenüng nenati amshio, Longsa Onger Salangi kukua aitsür aser iba kuli tejangja bener 31 August, 2024 anogo 10:00 am shitak nung nena (Aoshilu aser Tongpangkoba) Longsa Onger Salang nung jaoker.

Sd/-
Limaakum Jamir, Tatar
Aola
Longsa Onger Salang

Pakistan nung bus ana tsükok, nisung 37 asü



Islamabad, Luroi/August 25 (Agencies): Deobarnü Pakistan tesem ana nung bus ana tsükoka temeshi ainlen jajar nisung 11 densema nisung 37 asü aser aika yirua liasü.

Mezüngbuba lendong ya Balochistan province kübok Makran Coastal Highway nung atalok, kong nisung 70 mena aliba bus lenmang alema makepzüka ao. Iba lendong nung nisung 11 asü aser 35 yirua liasü. Iba bus nungya Iran nungi Punjab province bushia Shia pilgrims tem anir arurba liasü.

Bus telung nungi nisung pezü madokteti liasü, anungji crane ka bener arua agitetsüsa akum, ta yangji aliba police ketdangsür temi ashi.

Makran Coastal Highway ya tasazük kilometre 653 lir aser iba lenmang ya Sindh province nung aliba Karachi nungi Arabian Sea tzükum ajanga Balochistan province kübok Gwadar tashi oa lir. Iba lendong ajurua alirtem ya timba Lahore mesüra Gujranwala nungi lir ta police temi ashir.

Ano ghonda ishika lir Pakistan-occupied Kashmir nung nisung 35 mena aliba bus ka ayong tilaka nung tsüka nisung 26 asü aser asem yirua liasü, ta private ambulance service tulutiba aliba Edhi Foundation nungi Qamar

Nadeem-i ashi.

Bus indang brakes mapa meinyakba ajanga iba lendong ya ajuru, ta ashir.

Asürtem rongnung tanur, tetsür aser teburtem lir aser parnok ajak Sadhanoti district nungi lir ta Sadhanoti Deputy Commissioner Umar Farooq-i ashi.

Lendong atalokba tesem nung police, administration aser rescue team tem liasü. Asürtem karbo jangjatetogo ta ashir. Tir Asif Ali Zardari-i sangdong ka nung asükhu lemsatapa liasü.

“Tang mangyim-jashi mapang asür kinungertem den ni asükhu lemsateper aser teyari maparen tekeraba nung inyaktsü nungdaker,” ta pai ashi.

Punjab Chief Minister Maryam Nawaz-ia asükhu lemsatapa liasü. Iran nung Pakistan nung temeshi ainlen jajartem mena aliba bus ka tsükoka nisung 35 asü aser 15 yirur anogo ishika lir Deobarnü iba lendong ya ataloka liasü.

Prophet Muhammad’er semchir sür küm shia anogo 40 mang ayimba tembanga Shia Muslim nung meyirijang aika Iraq nung temeshi yimti Karbala-i aor.

Pakistan nung lenmang majungba den gari junga anepalu masüba aser driver meshidakba ajanga iba ama lendong mapang shia ataloker.

Nagaland nung tang mezüngbuba one on one coaching agütsütsü

Dimapur, Luroi/August 25 (TYO): Tang mezüngbuba Nagaland nung "Cricket coaching one on one & home coaching" agütsütsü.

Indian Fast Bowling Center-i, batting aser bowling naprongla atema personalized

one-on-one cricket coaching aser home coaching services agütsütsü. Wati Imsong-i (International Cricket Council-i agizüker aliba ICC certified coach) achaayanga training program ya assistant coach ana teyari agia tenzüksü.

Coach ana rongnung ka Nagaland nungi aser ka Mumbai nungi lir.

Coaching nung admission agitsü atema Head Coach Wati Imsong den iba number; 8730867448 ajanga tongteprateptetsü.

Phek District Open Veteran Badminton C'ship tenzükogo



Neiba Kronu, PDBA ketdangsürtem aser tanga ketdangsürtem Phek District Open Veteran Badminton Championship 2024 nung shilem agirtem den tangokba noksa nung angur.

Phek, Luroi/August 24 (TYO): Phek District Badminton Association (PDBA) aser Glory Peak Shuttlers Pfütsero na longjemer ayongzüka August 24 nü Phek District Open Veteran Badminton Championship 2024 tenzükogo. Iba asayamung ya Krokulo Foundation Khelo India Centre, Pfütsero nung asayadaki.

Asayamung lapokba sentong nung alakteta jaoker ama shilem agiba mapang taoba

mapang minister Neiba Kronu-i asaya nung temba jenjang tonga asayatsü aser taküm nung libaliro tajung benshitsü angazüksü ajungshia liasü.

Paisa, asayartem aser lokti lenirtem dang asaya ajanga kati ka tsüngda tesendaktep tali akangshitsü ajungshia liasü. Kronu-isa, asayartem pusemstü atema lokti lenirtem aser nübürtem aika adenshia aliba ngua kanga pelaba lemsatep aser parnok nem tenüngsang agüja liasü.

Ajak senteper veteran shuttlers 80 category 5 nung shilem agidar.

Asayamung nung takok anguba asayartem district tenüng nungi Nagaland Inter-District veteran badminton tournament nung asayatsü.

Asayamung lapokba sentong ya Dr.Nutazo Lohe, President PDBA lenisüba nung agi aser Nagaland Badminton Association Executive Member Kelhikha Kenye-i lokti ayongzüka o jembia liasü.

Paralympics: Officials 95-i Indian contingent meina aotsü

Luroi/August 25, 2024 (Agencies): Paris Paralympics nung shilem agitsü aliba Indian contingent nung züngsem 84 meina official 95 aotsü, kechiyong asayartem aika pei nüngdak peritsütsü atema personal coach aser escort temi meiner aotsüsa akümer.

India contingent nung ajak senteper züngsem 179 taküm Paris Paralympics nung shilem agitsü aotsü, koba August 28 nü tenzüksü.

Official 95 rongnung parnok 77 team official, teku contingent medical official aser ano tang contingent official teku densema lir.

Taküm iba asayamung nung shilem agitsü atema India nung asayartem aika yoktsü lir aser asayar 84 asaya 12 nung shilem agiba angutsü. 2021 küm Tokyo Paralympics nung India nung asayar 54-i asaya teku nung shilem agia liasü.

"Para-athletes tem pei jurila tenüngdakba apir personal coach tem contingent nung

zungoksemogo. Ajisüaka Chef de Mission/team head coach tetuyuba dak ajemdaker parnoki tanga asayartem nema tenüngdakba teyari agütsütsü," ta ministry-i ashi.

"Chef de Mission aser para-badminton contingent team manager ka dak alaka contingent (Asayar, contingent officials, coaches) ajak atema sorkari seotsü teyari agütsütsü," ta kasa sangdong ajanga metetdaksü.

Javelin thrower Sumit Antil aser shooter Avani Lekhara nung amala asayar, shirnok parnok indang Tokyo Paralympics gold defend asütsü lir parnok amala asayartem atema personal coach tem anisemogo.

"Para sports event tem nung asayartem ya able-bodied competitors tem dang nungi personal coach aser escort amala support staff tem tali nüngdaker. Anungji para-sports atema support staff talila nüngdakba ya kecha tasen

masü," ta team ketdangsür kati ashi.

Para-athletics team, kong asayar 38 lir parnok atema personal coach aser escort tema tali asütsü.

CDM aser para-badminton team manager dak alaka contingent züngsem ajak nem anogoshia out-of-pocket allowance USD 50 agütsütsü.

Paralympic Committee of India tir Devendra Jhajharia, shiba Deobarnü CDM Satya Prakash Sangwan densema contingent tulu ka den Paris-iogo pai Honibarnü ashiba agi, pa asayar ajak anepalutsü atema Games Village tema nungang anenzüksü, kechiyong asayartem karbo Paris adena or asayatsü lir.

Jhajharia-i ashiba agi, India team-i iba asayamung nung medal 25 dak tema angutsü timla lir. Tokyo Paralympics nung India nung asayartem medal 19 (5 gold, 8 silver, 6 bronze) ngua liasü, koba tang tashi nung medal timtiba anguba lir.

Pak vs Ban: Bangladesh-i otsüsü tsüsa mezüngbuba Test kokogo



Luroi/August 25, 2024

(Agencies): Bangladesh team-i otsüsütsüsa Pakistan den mezüngbuba Test asaya akokba dang masü saka parnoki Pakistan nung asayaba mapang team kechaia mekoktetba ama takok tajung ngutetogo.

Bangladesh team ya Pakistan nung Test asayaba mapang Pakistan team wicket 10 agi akokba mezüngbuba team kuma otsü tasen ka yangluogo.

Bangladesh team-i iba otsü tasen ya Deobarnü Rawalpindi nung mezüngbuba test asayaba mapang yanglua liasü. Kasa mapang nung linük ana tsüngda 14 ben asayaba sülen tang mezüngbuba Bangladesh-i takok ngutetogo.

Mezüngbuba innings nung Bangladesh team run 117 agi timba liasü. Test asaya tatembangbuba anogo Bangladesh team-i Pakistan pur nem run 146 dang yangludaktsür asayar ajak out sütsü aser asaya akoktsü atema run 30 dang nungdaka liasü. Iba

sülen Bangladesh nung opener anati wicket ka danga out mesü iba run menepa asaya akok.

Kasa mapang nung opponent team-i innings ka declare asüba sülen Bangladesh-i tang mezüngbuba Test asaya ka kokogo.

Openers Zakir Hasan aser Shadman Islam nati over 6.3 nung dang run menepa asaya koka liasü.

Tanabuba innings nung Pakistan nung batter temi Bangladesh nung spinner temi aonba ball kanga junga masayatet aser parnok rongnungi Mohammad Rizwan-i dang (run 51) junga asaya liasü.

Bangladesh nung bowler tem rongnungi Mehidy Hasan Miraz-i run 21 agütsür wicket 4 agi aser Shakib Al Hasan-i run 44 agütsür wicket 3 agia liasü.

Test asaya ana asayatsü aliba tang Bangladesh-i mezüngbuba koka parnok 1-0 agi tejakdang lir. Tanabuba Test ya Rawalpindi nungsa August 30 nü tenzüksü.

SL den tanungba Test asaya atema Wood melen Hull shimogo

Luroi/August 25, 2024

(Agencies): Sri Lanka den tang asaya aliba test asayamung atema England nung asayar Mark Wood melen arishi küm 20 tain Josh Hull shimogo.

Arishi küm 34 tain Wood ya mezüngbuba test asayaba mapang tasemnübuba tebi yiruba sülen pa Honibarnü masayai liasü. Iba asaya ya England-i wicket pongu agi kokogo.

Scan ka agiba sülen pa tanungba asayatem nung masayatetsü ta jangaigo, saka pa October ita Pakistan nung oa asayaba mapangbo asayatetsü imlar.

Mezüngbuba Test nung Olly Stone England squad nung liasü aser pa Lord's nung Bresthostibarnü nungi tenzuka tanabuba Test asaya nung Wood melen asayatsü imlar.

Nottinghamshire nungi asayar Stone ya ball kanga kara aonba asayar ka aser pai Test asaya asem nung wicket 10 agir lir.

Leicestershire nungi left-armner Hull, first-class asaya 10 dang asayar liaka pa tang mezüngbuba senior England squad nungi asayatsü shimogo.

Iba ita tetenzüklen Sri Lankan den tour game asayaba mapang pai England Lions atema wicket pongu agia liasü.

"Yasüng 9:30 shi nung Brendon McCullum-i call süa liasü, koba kü atema kanga tongtiba liasü," ta Hull-i BBC Radio Leicester dang ashi.

"Ni ita karabo ni team nungi asayatsü atema jaoktsü ta bilema maliasü, saka team nung adentsü yongyaseta atar," ta paisa ashi.

Wood-i taküm kanga junga asaya arua liasü aser West Indies den Test asem aser Sri Lanka den mezüngbuba Test asayaba mapang pai kanga junga asayaigo.

Taoba küm Ashes asayaba mapang nungi Test tem nung asaya tenzükba sülen pa England team nung first-choice asayar ka kumogo.

BILEMDANGANG

"Kong terenlok indang mejembir idak nungjiagi na pila liang."